

摘藻堂四庫全書薈要

史部

欽定四庫全書叢要

史部

明史卷三百十九



詳校官中書

臣

劉源溥

欽定四庫全書薈要卷六千九百二

史部

明史卷三百九

大學士張廷玉等奉 敕修

傳第一百九十七

流賊

盜賊之禍歷代恒有至明末李自成張獻忠極矣史冊  
所載未有若斯之酷者也永樂中唐賽兒倡亂山東厥  
後乘瑕弄兵頻見竊發然皆旋就撲滅惟武宗之世流

寇蔓延幾危宗社而卒以掃除莊烈帝勵精有為視武  
宗何啻霄壤而顧失天下何也明興百年朝廷之綱紀  
既肅天下之風俗未澆孝宗選舉賢能布列中外與斯  
民休養生息者十餘年仁澤深而人心固元氣盛而國  
脈安雖以武之童昏亟行稗政中官倖夫濁亂左右而  
本根尚未盡撥宰輔亦多老成迫盜賊四起王瓊獨典  
中樞陸完彭澤分任閫帥委寄既專旁撓絕少以故危  
而不亡莊烈帝承神熹之後神宗怠荒棄政熹宗暱近

閹人元氣盡漸國脈垂絕向使熹宗御宇復延數載則天下之亡不再傳矣莊烈之繼統也臣寮之黨局已成草野之物力已耗國家之法令已壞邊疆之搶攘已甚莊烈雖銳意更始治核名實而人才之賢否議論之是非政事之得失軍機之成敗未能灼見於中不搖於外也且性多疑而任寮好剛而尚氣任寮則苛刻寡恩尚氣則急遽失措當夫羣盜滿山四方鼎沸而委政柄者非庸即佞勦撫兩端茫無成算内外大臣救過不給人

懷規利自全之心言語戇直切中事弊者率皆摧折以去其所任為閫帥者事權中制功過莫償敗一方即戮一將墮一城即殺一吏賞罰太明而至於不能罰制馭過嚴而至於不能制加以天災流行饑饉洊臻政繁賦重外訐內叛譬一人之身元氣羸然疽毒並發厥症固已甚危而醫則良否錯進劑則寒熱互投病入膏肓而無可救不亡何待哉是故明之亡亡於流賊而其致亡之本不在於流賊也嗚呼莊烈非亡國之君而當亡國

之運又乏救亡之術徒見其焦勞督亂子立於上十有七年而帷幄不聞良平之謀行間未都李郭之將卒致宗社顛覆徒以身殉悲夫自唐賽兒以下本末易竟事具勦賊諸臣傳中獨志其亡天下者立李自成張獻忠傳

李自成

張獻忠

李自成米脂人世居懷遠堡李繼遷寨父守忠無子禱於華山夢神告曰以破軍星為若子已生自成幼牧羊

於邑大姓艾氏及長充銀川驛卒善騎射鬪很無賴數犯法知縣晏子賓捕之將置諸死脫去為屠天啟末魏忠賢黨喬應甲為陝西巡撫朱童蒙為延綏巡撫貪黷不詰盜盜由是始崇禎元年陝西大饑延綏缺餉固原兵劫州庫白水賊王二府谷賊王嘉允宜州賊王左掛飛山虎大紅狼等一時並起有安塞馬賊高迎祥者自成舅也與饑民王大梁聚眾應之迎祥自稱闖王大梁自稱大梁王二年春詔以楊鶴為三邊總督捕之參政



劉應遇擊斬王二王。大梁參議洪承疇擊破王左掛賊。稍稍懼。會京師戒嚴。山西巡撫耿如杞勤王兵譁。而西延綏總兵吳自勉甘肅巡撫梅之煥勤王兵亦潰。與羣盜合。延綏巡撫張夢鯨恚死。承疇代之。召故總兵杜文煥督延綏。固原兵便宜勦賊。三年。王左掛王子順苗美等戰屢敗。乞降。而王嘉允掠延安慶陽間。楊鶴撫之不聽。從神木渡河犯山西。是時秦地所徵曰新餉。曰均輸。曰間架。其目日增。吏因緣為姦。民大困。以給事中劉懋

議裁驛站山陝游民仰驛糶者無所得食俱從賊賊轉  
盛兵部郎中李繼貞奏曰延民饑將盡為盜請以帑金  
十萬賑之帝不聽而嘉允已襲破黃甫川清水木瓜三  
堡陷府谷河曲又有神一元不沾泥可天飛郝臨菴紅  
軍友點燈子李老柴混天猴獨行狼諸賊所在蜂起或  
掠奏或東入晉屠陷城堡官兵東西奔擊賊或降或死  
旋滅旋熾延安賊張獻忠亦聚衆據十八寨稱八大王  
四年孤山副將曹文詔破賊河曲王嘉允遁去已復自

岳陽突犯澤潞為左右所殺其黨共推王自用號紫金  
梁者為魁自用結羣賊老猢猻曹操八金剛掃地王射  
塌天閻正虎滿天星破甲雉刑紅狼上天龍蝎子塊過  
天星混世王等及迎祥獻忠共三十六營衆二十餘萬  
聚山西自成乃與兄子過往從迎祥與獻忠等合號闖  
將未有名楊鶴撫賊不效被逮洪承疇代鶴張福臻代  
承疇督諸將曹文詔楊嘉謨勦賊所向克捷陝地畧定  
而山西賊大盛剽掠寧鄉石樓稷山聞喜河津間五年

賊分道四出連陷大寧隰州澤州壽陽諸州縣全晉震動乃罷巡撫宋統殷以許鼎臣代之與宣大總督張宗衡分督諸將宋衡督虎大威賀人龍左良玉等兵八千人駐平陽責以平陽澤潞四十一州縣鼎臣督張應昌頗希牧艾萬年兵七千人駐汾州責以汾太沁遼三十八十縣賊亦轉入磨盤山分衆為三閭正虎據交城文水窺太原邢紅狼上天龍據吳城窺汾州自用忠獻突沁州武鄉陷遼州六年春官兵共進力擊自用懼乞降

於故錦衣僉事張道濬約未定陽和兵襲之賊怒賊約  
去會總兵官曹文詔率陝西兵至偕諸將猛如虎虎大  
威頗希牧艾萬年張應昌等合勦屢戰皆大克前後殺  
混世王滿天星姬闢鎖翻山動掌世王顯道神等破自  
用獻忠老猢猻蝎子塊掃地王諸賊其後自用又為川  
將鄧圪射殺之山西三大盜俱敗初賊之破澤州也分  
其衆南踰太行掠濟源清化修武圍懷慶官軍擊之賊  
遁走別賊復闖入西山大掠順德真定間大名道盧象

昇力戰却賊賊自邢臺摩天嶺西下抵武安敗總兵左良玉河北三府焚劫殆徧潞王上疏告急兼請衛鳳泗陵寢詔特遣總兵倪寵王樸率京營兵六千人與諸將並進賊聞之欲從河內走太行文詔邀擊之不敢進賊之敗於山西者亦奔河北合營迎祥自成獻忠曹操老狍狍等俱至京兵蹙其後左良玉湯九州等扼其前連戰於青店石岡石坡牛尾柳泉猛虎村屢敗之賊欲逸阻於河大困賊素畏文詔道濬道濬先坐事遣戍文詔

轉戰秦晉河北遇賊輒大克御史復劾其驕倨調大同  
總兵去賊遂詭辭乞降監軍太監楊進朝信之為入奏  
會天寒河冰合賊眾從毛家寨策馬徑渡河南諸軍無  
扼河者賊遂連陷澠池伊陽盧氏三縣河南巡撫元默  
率諸將盛兵待之賊竄入盧氏山中由間道直走內鄉  
掠鄖陽又分掠南陽汝寧入棗陽當陽徧湖廣巡撫唐  
暉敕兵守境犯歸巴夷陵等處破夔州攻廣元逼四川  
所在告急七年春特設山陝河南湖廣四川總督專辦

賊以延綏巡撫陳奇瑜為之以盧象昇撫治鄖陽為奇瑜破賊延水關有威名而象昇歷戰陣知兵也於是奇瑜自均州入與象昇並進師次烏林關斬賊數千級賊走漢南奇瑜以湖廣不足憂引兵西擊始賊自澠池渡河高迎祥最強自成屬焉及入河南自成與兄子過結李牟俞彬白廣恩李雙喜顧君恩高傑等自為一軍過傑善戰君恩善謀及奇瑜兵至獻忠等奔商雒自成等陷於興安之車箱峽會大雨兩月馬乏芻多死弓矢皆



脫自成用君恩計賄奇瑜左右詐降奇瑜意輕賊許之  
檄諸將按兵毋殺所過州縣為具糗傳送賊甫渡棧即  
大譟盡屠所過七州縣而畧陽賊數萬亦來會賊勢愈  
張奇瑜坐削籍而自成名始著矣已洪承疇代奇瑜李  
喬巡撫陝西吳甡巡撫山西大學士溫體仁謂甡曰流  
賊癘疥疾勿憂也未幾西寧兵變承疇甫受命而東聞  
變遽返迎祥自成遂入鞏昌平涼臨洮鳳翔諸府數十  
州縣敗賀人龍張天禮軍殺固原道陸夢龍圍隴州四

十餘日承疇檄總兵左光先與人龍合擊大破之會朝廷亦命豫楚晉蜀兵四道入陝迎祥自成遂竄入終南山已而東出陷陳州靈寶汜水滎陽聞左良玉將至移壁梅山溱水間郤賊拔下蔡燒汝寧郭乃命承疇出關追賊與山東巡撫朱大典并力擊賊偵知之八年正月大會於滎陽老猗猗曹操革裏眼左金王改世王射塌天橫天王混十萬過天星九條龍順天王及迎祥獻忠共十三家七十二營議拒敵未決自成進曰一夫猶奮

況十萬衆乎官兵無能為也宜分兵定所向利鈍聽之

天皆曰善乃議革裏眼左金王當川湖兵橫天王混十  
萬當陝兵曹操過天星扼河上迎祥獻忠及自成等畧  
東方老猢猻九條龍往來策應陝兵銳益以射塌天改  
世王所破城邑子女玉帛惟均衆如自成言先是南京  
兵部尚書呂維祺懼賊南犯請加防鳳陽陵寢不報及  
迎祥獻忠東下江北兵單固始霍邱俱失守賊燔壽州  
陷潁州知州尹夢鼇州判趙士寬戰死殺故尚書張鶴

鳴乘勝陷鳳陽焚皇陵留守署正朱國相等皆戰死事  
聞帝素服哭遣官告廟逮漕運都御史楊一鵬棄市以  
朱大典代之大徵兵討賊賊乃大書幟曰古元真龍皇  
帝合樂大飲自成從獻忠求皇陵監小閹善鼓吹者獻  
忠不與自成怒偕迎祥西趨歸德與曹操過天星合復  
入陝西獻忠獨東下廬州承疇方馳至汝州命諸將左  
良玉湯九州尤世威徐來朝陳永福鄧玘張應昌分扼  
湖廣河南鄖陽諸關隘召曹文詔為中軍文詔未至玘

以兵亂死迎祥自成從終南山出大掠富平寧州老獬  
獬獻忠曹操蝎子塊過天星諸賊聞承疇出關先後皆  
走陝西焚掠西安平涼鳳翔諸郡承疇亟還救分遣諸  
將擊老獬獬等令副總兵劉成功艾萬年擊迎祥自成  
於寧州萬年中伏戰死文詔怒復擊之亦中伏戰死羣  
賊乘勝掠地火照西安城中承疇力禦之涇陽三原間  
決死戰賊不得過獻忠老獬獬等由他道轉突朱陽關  
守關將徐來臣軍潰死尤世威中箭遁於是羣賊皆出

關分十三營東犯而迎祥自成獨留陝西時盧象昇已  
改湖廣巡撫總理直隸河南山東四川湖廣諸軍務詔  
承疇督關中象昇督關外賊亦分兵迎祥畧武功扶風  
以西自成畧富平固州以東承疇遣將追自成小捷至  
醴泉賊將高傑通於自成妻刑氏懼誅挾之來降承疇  
身遣自成大戰渭南臨潼自成大敗東走迎祥亦屢敗  
東踰華陰南原絕巔偕自成出朱陽關與獻忠合冬十  
一月羣賊薄閩鄉左良玉祖寬禦之不克遂陷陝州進

攻雒陽河南巡撫陳必謙督良玉寬援雒陽獻忠走嵩

汝迎祥自成走偃師鞏縣畧魯山葉縣陷光州象昇擊

敗之確山九年春迎祥自成攻廬州不拔陷含山和州

殺知州黎弘業及在籍御史馬如蛟等又攻滁州知州

劉大鞏太僕卿李覺斯堅守不下象昇親督祖寬羅岱

楊世恩等來援戰於朱龍橋賊大敗屍咽水不流北攻

壽州故御史方震孺堅守折而西入歸德邊將祖大樂

破之走密登封故總兵湯九州戰死分道犯南陽裕州

必謙援南陽象昇援裕令大樂等擊賊殺迎祥自成精  
銳幾盡賊復分兵再入陝迎祥由鄖襄趨興安漢中自  
成由南山踰商雒走延綏犯鞏昌北境諸將左光先曹  
變蛟破之自成走環縣未幾官軍敗於羅家山盡亡士  
馬器仗總兵官俞翀霄被執自成勢復振進圍綏德欲  
東渡河山西兵遏之復西掠米脂呼知縣邊大綬曰此  
吾故鄉也勿虐我老遺之金令修文廟將將襲榆林河  
水驟長賊淹死甚衆乃改道從韓城而西時象昇及大



樂寬等皆入援京師孫傳庭新除陝西巡撫銳意滅賊  
秋七月禽迎祥於盤屋獻俘闕下磔死於是賊黨乃共  
推自成為闖王矣是月犯階薇未幾出汧隴犯鳳翔渡  
渭河十年犯涇陽三原蝎子塊過天星俱來會傳庭督  
變蛟連戰七日皆克蝎子塊降自成與過天星奔秦州  
入蜀陷寧羌破七盤關陷廣元總兵官侯良柱戰死遂  
連陷昭化劔州梓潼江由黎雅青州等州縣劔州知州  
徐尚卿吏目李英俊昭化知縣王時化郾縣主簿張應

奇金堂典史潘夢科皆死進攻成都七日不克巡撫王維章生避賊徵十一年春官軍敗賊梓潼自成奔白水食盡承疇傳庭合擊於梓潼原大破之自成盡亡其卒獨與劉宗敏田見秀等十八騎潰圍竄伏商洛山中其年獻忠降自成勢益衰承疇改薊遼總督傳庭改保定總督傳庭以疾辭逮下獄二人去自成稍得安總理熊文燦方主撫諜者或報自成死益寬之十二年夏獻忠反穀城自成大喜出收衆衆復大集陝西總督鄭崇儉

發兵圍之令曰圍師必缺自成乃由缺走突武關徃依  
獻忠獻忠欲圖之覺遁去楊嗣昌督師夷陵檄令降自  
成出謾語官軍圍自成於巴西魚復諸山中自成大困  
欲自經養子雙喜勸而止賊將多出降劉宗敏者藍田  
鍛工也最驍勇亦欲降自成與步入叢祠顧而歎曰人  
言我當為天子盍卜之不吉斷我頭以降宗敏諾三卜  
三吉宗敏還殺其兩妻謂自成曰吾死從君矣軍中壯  
士聞之亦多殺妻子願從者自成乃盡焚輜重輕騎由

鄖均走河南河南大旱斛穀萬錢饑民從自成者數萬  
遂自南陽出攻宜陽殺知縣唐啟泰攻永寧殺知縣武  
大烈戕萬安王采鏗攻偃師知縣徐日泰罵賊死時十  
三年十二月也自成為人高顴深頤鳴日鵠鼻聲如豺  
性猜忍日殺人斫足剖心為戲所過民皆保塢堡不下  
杞縣舉人李信者逆案中尚書李精白子也嘗出粟振  
饑民民德之曰李公子活我會繩伎紅娘子反據信強  
委身焉信逃歸官以為賊囚獄中紅娘子來救饑民應

之共出信盧氏舉人牛金星磨勘被斥私入自成軍為主謀潛歸事洩坐斬已得未減二人皆往投自成自成大喜改信名曰巖金星又薦卜者宋獻策長三尺餘上識記云十八子主神器自成大悅巖因說曰取天下以人心為本請勿殺人收天下心自成從之屠戮為減又散所掠財物振饑民民受餉者不辨巖自成也雜呼曰李公子活我巖復造謠詞曰迎闖王不納糧使兒童歌以相煽從自成者日衆十四年正月攻河南有營卒勾

賊城遂陷福王常洵遇害自成兵灼王血雜鹿醢嘗之  
名福祿酒王世子由松裸而逃自成發王邸金振饑民  
遂移攻開封時張獻忠亦陷襄陽戕襄王翊銘王開封  
者周王恭枋聞賊至急發庫金募死士與巡撫都御史  
高名衡等固守自成攻七晝夜解去屠密縣賊魁羅汝  
才土寇袁時中皆歸自成時中衆二十萬號小袁營汝  
才即曹操與獻忠同降復叛去者也自成初為迎祥禪  
將至是勢大盛帝以故尚書傅宗龍為陝西總督使專

辦自成別勅保定總督楊文岳會師宗龍馳入關與巡撫汪喬年調兵兵已發盡乃檄河南大將李國奇賀人龍兵隸部下亟出關文岳率虎太威軍俱至新蔡與自成遇人龍卒先奔國奇大威繼之宗龍文岳以親軍築壘自固夜文岳兵潰奔陳州宗龍與賊持數日食盡突圍走被執死自成陷葉縣殺副將劉國能遂圍左良玉於郢城喬年代宗龍總督出關次襄城自成盡銳攻之喬年與副將李萬慶皆死自成剗刖諸生百九十人遂

乘勝陷南陽鄧州十四城再圍開封巡撫名衡總兵陳永福力拒之射中自成目礮殪上天龍等自成益怒自成每攻城不用古梯衝法專取甌甌得一甌即歸營卧後者必斬取甌已即穿穴穴成初僅容一人漸至百十次第傳土以出過三五步留一土柱繫以巨絙穿畢萬人曳絙一呼而柱折城崩美名衡於城上鑿橫道聽其下有聲用毒穢灌之多死賊乃即城壞處用火攻法實藥甕中火然藥發當者輒糜碎名曰放迸十五年二月



城半圯賊用放迸法攻之鐵騎數千馳譟伺城頽即擁  
入城城故宋汴都金人所重築也厚數丈土堅火外擊  
賊騎多殲自成駭而去南陷西華尋屠陳州副使關永  
傑知州侯君耀皆罵賊死歸德睢州寧陵大康數十郡  
縣悉殘燬商邱知縣梁以樟創死復蘇全家殲焉已復  
攻開封築長圍為持久計詔起孫傳庭為總督釋故尚  
書侯恂命督師召左良玉援開封良玉至朱仙鎮大敗  
奔襄陽諸軍皆屯河北不敢進開封食盡山東總兵劉

澤清亦奉詔至傳庭知開封急大會諸將西安亟出關  
來救未至名衡等議決朱家寨口河灌賊賊亦決馬家  
口河欲灌城秋九月癸未天大雨二口並決聲如雷潰  
北門入穿東南門出注渦水城中百萬戶皆沒得脫者  
惟周王妃世子及撫按以下不及二萬人賊亦漂沒萬  
餘乃拔營西南去先是有馬守應稱老狍狍賀一龍稱  
革裏眼賀錦稱左金王劉希堯稱爭世王蘭養成稱亂  
世王者皆附自成時號革左五營自成乃西迎傳庭兵

遇於南陽傳庭軍敗走豫人所謂柿園之敗也是時  
大清兵南攻京師方告急朝廷不暇復討賊自成乃收  
羣賊連營五百餘里再屠南陽進攻汝寧總兵虎大威  
中礮死楊文岳被殺自成乃脅崇王由棧使從軍遂由  
碓山信陽泌陽向襄陽左良玉望風南走自成入襄陽  
分徇屬城及德安諸州縣皆下再破夷陵荊門州自成  
自攻荊州湘陰王儼鈺遇害燒獻陵木城穿燬宮殿十  
六年春陷承天將發獻陵有聲震山谷懼而止旁掠潛

山京山雲夢黃陂孝感等州縣皆下先驅徧漢陽良王  
走九江攻鄖陽撫治都御史徐起元及王光恩力守不  
下光恩賊反正者也自成自號奉天倡義大元帥號羅  
汝才代天撫民威德大將軍分其衆曰標營領兵百隊  
曰前後左右營各領兵三十餘隊標營白幟黑纛自成  
獨白纛大纛銀浮屠左營幟白右緋前黑後黃纛隨其  
色五營以序直晝夜次第休息巡徼嚴密逃者謂之落  
草磔之收男子十五以上四十以下者為兵精兵一人

主留器械執纓者十人軍令不得藏白金過城邑不得  
室處妻子外不得攜他婦人寢興悉用單布幕繇甲厚  
百層矢礮不能入一兵倅馬三四匹冬則以茵褥藉其  
蹠剖人腹為馬槽以餉馬馬見人輒鋸牙思噬勢若虎豹  
軍止即出較騎射曰站隊夜四鼓蓐食以聽令所過崇  
岡峻坂騰馬直上惟憚黃河若淮泗涇渭則萬衆翹  
足馬背或抱髯緣尾呼風而渡馬蹏所壅閼水為不流  
臨陣列馬三萬名三堵牆前者返顧後者殺之戰久不

勝馬兵佯敗誘官兵步卒長鎗三萬擊刺如飛馬兵回  
擊無不大勝攻城迎降者不殺守一日殺十之三二日  
殺十之七三日屠之凡殺人束屍為燎謂之打亮城將  
陷步兵萬人環堞下馬兵巡徼無一人得免獻忠雖至  
殘忍不逮也諸營較所獲馬騾者上賞弓矢鉛銃者次  
之幣帛又次之珠玉為下自成不好酒色脫粟粗糲與  
其下共甘苦汝才妻妾數十被服紈綺帳下女樂數部  
厚自奉養自成嘗嗤鄙之汝才衆數十萬用山西舉人

吉珪為謀主自成善攻汝才善戰兩人相須若左右手  
自成下宛葉克梁宋兵強士附有專制心顧獨忌汝才  
乃召汝才所善賀一龍宴縛之晨以二十騎斬汝才於  
帳中悉蕪其衆自成在中州所畧城輒焚燬之及渡漢  
江謀以荆襄為根本改襄陽曰襄京修襄王宮殿居之  
改禹州曰均平府承天府曰揚武州他府縣多所更易  
牛金星教以勅官爵名號大行署置自成無子兄子過  
及妻弟高一功迭居左右親信用事田見秀劉宗敏為

權將軍李巖賀錦劉希堯等為制將軍張龜党守素等  
為威武將軍谷可成任維榮等為果毅將軍凡五營二  
十二將又置上相左輔右弼六政府侍郎即中從事等  
官要地設防禦使府曰尹州曰牧縣曰令封崇王由棧  
襄陽伯邵陵王在城棗陽伯保寧王紹圻宣城伯肅寧  
王術授順義伯以張國紳為上相牛金星為左輔來儀  
為右弼國紳安定人嘗官叅政既降獻文翔鳳妻鄧氏  
以媚自成自成惡其傷同類殺之而歸鄧氏於其家六



政府侍郎則石首喻上猷江陵蕭應坤招遠楊永裕米  
脂李振聲江陵鄧巖忠西安姚錫允尋以宣城邱之陶  
代振聲為兵政府侍郎其餘受偽職者甚衆不具載使  
高一功馮雄守襄陽任繼光守荊州蘭養成牛萬才守  
夷陵王文曜守澧州白旺守安陵蕭雲林守荊門謝應  
龍守漢川周鳳梧守禹州於是河南湖廣江北諸賊莫  
不聽命自成既殺汝才一龍又襲殺養成奪守應兵擊  
殺袁時中於杞縣獻忠方據武昌自成遣使賀且脅之

曰老獬獬已降曹操輩誅死行及汝矣獻忠大懼南入  
長沙當是時十三家七十二營諸大賊降死殆盡惟自  
成獻忠存而自成獨勁遂自稱曰新順王集牛金星等  
議兵所向金星請先取河北直走京師楊永裕請下金  
陵斷燕都糧道從事顧君恩曰金陵居下流事雖濟失  
之緩直走京師不勝退安所歸失之急關中大王桑梓  
邦也百二山河得天下三分之二宜先取之建立基業  
然後旁略三邊資其兵力功取山西後向京師庶幾進

戰退守萬全無失自成從之傳庭之敗於柿園而歸陝也  
大治兵制火車二萬輛募壯士使白廣恩高傑將欲  
俟賊饑而擊之朝議日督戰不得已出關以牛成盧光  
祖為前鋒由靈寶入洛高傑為中軍檄廣恩從新安來  
會河南將陳永福守新灘四川將秦翼明出商洛為犄  
角前鋒敗賊澠池至寶豐再拔其城次邾自成率萬騎  
還戰復大敗幾被禽會天大雨道泞糧車不進自成遣  
輕騎出汝州要截糧道傳庭乃分軍三令廣恩從大道

令高傑親隨從間道迎糧令永福守營傳庭既行永福  
兵亦爭發不可禁遂為賊所躡至南陽傳庭還戰賊陣  
五重官軍克其三已而稍却火車奔騎兵亦大奔賊縱  
鐵騎踐之傳庭大敗自成空壁追一日夜踰四百里官  
軍死者四萬餘人失兵器輜重數十萬傳庭奔河北轉  
趨潼關氣賊沮不復振冬十月自成陷潼關傳庭死遂  
連破華陰渭南華商臨潼進攻西安守將王根子開東  
門納賊自成執秦王存樞以為權將軍永壽王詛泥為

制將軍巡撫馮師孔以下死者十餘人布政使陸之祺等俱降自成大掠三日下令禁止改西安曰長安稱西京賜顧君恩女樂一部賞入關策也大發民修長安城開馳道自成每三日親赴教場校射百姓望見黃龍纛咸伏地呼萬歲諸將白廣恩高汝利左光先梁甫先後皆降陳永福以先射中自成目保山巔不敢下自成折箭為誓招之亦降惟高傑以竊自成妻走延安為李過所追折而東渡宜川絕蒲津以守自成兵所至風靡乃

詣米脂祭墓向為官軍所發焚棄遺骸築土封之求其宗人贈金封爵以去改延安府曰天保府米脂曰天保縣清澗曰天波府鳳翔不下屠之始自成入陝西自謂故鄉毋有侵暴未一月抄掠如故又以士大夫必不附已悉索諸薦紳掠掠徵其金死者瘞一穴榆林故死守李過等不能克自成發兵攻陷之副使都任總兵王世國尤世威等俱不屈死乘勝取寧夏屠慶陽執韓王稟塔移攻蘭州甘肅巡撫林曰瑞等亦死進陷西寧於

是肅州山丹永昌鎮番莊浪皆降陝西地悉歸自成又遣賊渡河陷平陽殺宗室三百餘人高傑奔澤州詔以余應桂總督三邊收邊兵勦賊然全陝已沒應桂不能進十七年正月庚寅朔自成稱王於西安僭國號曰大順改元永昌改名自晟追尊其曾祖以下加謚號以李繼遷為太祖設天佑殿大學士以牛金星為之增置六政府尚書設宏文館文諭院諫議直指使從政統會尚契司驗馬寺知政使書寫房等官以乾州宋企郊為吏

政尚書平湖陸子祺為戶政尚書真寧鞏煊為禮政尚書歸安張嶙然為兵政尚書復五等爵大封功臣候劉宗敏以下九人伯劉體純以下七十二人子三十人男五十五人定軍制有一馬僂行列者斬之馬騰入田苗者斬之籍步兵四十萬馬兵六十萬兵政侍郎楊王休為都肄出橫門至渭橋金鼓動地令宏文館學士李化鱗等草檄馳諭遠近指斥乘輿是日大風霾黃霧四塞事聞帝大驚召廷臣議大學士李建泰請督師帝許之



時山西自平陽陷河津稷山滎河皆陷他府縣多望風  
送款二月自成渡河破汾州徇河曲靜樂攻太原執晉  
王求桂巡撫蔡懋德死之北徇忻代寧武總兵周遇吉  
戰死自成先遣游兵入故關掠大名真定而北身率衆  
賊並邊東犯陷大同巡撫衛景瑗總兵朱三樂死自成  
殺代王傳燾代藩宗室殆盡犯宣府總兵姜瓖迎降巡  
撫朱之馮死遂犯陽和由柳溝逼居庸總兵官唐通太  
監杜之秩迎降三月十三日焚昌平總兵官李守鐔死

始賊欲偵京師虛實往往陰遣人輦重貨賈販都市又令充部院諸掾吏探刺機密朝廷有謀議數千里立馳報及抵昌平兵部發騎探賊賊輒勾之降無一還者賊游騎至平則門京師猶不知也十七日帝召問羣臣莫對有泣者俄頃賊環攻九門門外先設三大營悉降賊京師久乏餉乘隙者少益以內侍內侍專守城事百司不敢問十八日賊攻益急自成駐彰義門外遣降賊太監柱勲總入見帝求禪位帝怒叱之下詔親征日暝太

監曹化淳啟彰義門賊盡八帝出宮登煤山望烽火徹  
天歎息曰苦我民耳徘徊久之歸乾清宮令送太子及  
永王定王於戚臣周奎田宏遇第劒擊長公主趣皇后  
自盡十九日丁未天未明皇城不守鳴鐘集百官無至  
者乃復登煤山書衣襟為遺詔以帛自縊於山亭帝遂  
崩太監王承恩縊於側自成羶笠縹衣乘烏駁馬入承  
天門偽丞相牛金星尚書宋企郊喻上猷侍郎黎志陞  
張嶙然等騎而從登皇極殿據御座下令大索帝后期

百官三日朝見文臣自范景文勲戚自劉炳文以下殉節者四十餘人宮女魏氏投河從者二百餘人象房象皆哀吼流淚太子投周奎家不得入二王亦不能匿先後擁至皆不屈自成羈之宮中長公主絕而復甦昇至令賊劉宗敏療治已乃知帝后崩自成命以宮扉載出盛柳棺置東華門外百姓過者皆掩泣越三日己酉昧爽成國公朱純臣大學士魏藻德率文武百官入賀皆衣素服坐殿前自成不出羣賊爭戲侮為椎背脫帽或舉

足加頸相笑樂百官懾伏不敢動太監王德化叱諸臣  
曰國亡君喪若曹不思殯先帝乃在此耶因哭內侍數  
十人皆哭藻德等亦哭顧君恩以告自成改殮帝后用  
袞冕禕翟加葦殿云大學士陳演勸進不許封太子為  
宋王於刑部錦衣衛繫囚自成自居西安建置官吏至  
是益盡改官制六部曰六政府司官曰從事六科曰諫  
議十三道曰直指使翰林院曰弘文館太僕寺曰驗馬  
寺巡撫曰節度使兵備曰防禦使知府州縣曰尹曰牧

曰令召見朝官自成南嚮坐金星宗敏企郊等左右雜坐以次呼名分三等授職自四品以下少詹事梁紹陽楊觀光等無不汚偽命三品以上獨用故侍郎侯恂其餘勲戚文武諸臣奎純臣演藻德等共八百餘人送宗敏等營中拷掠責賕賂至灼肉折脛備諸慘毒藻德遇馬世奇家人泣曰吾不能為若主今求死不得賊又編排甲令五家養一賊大縱淫掠民不勝毒縊死相望徵諸勲戚大臣金金足輒殺之焚太廟神主遷太祖主於

帝王廟時賊黨已陷保定李建泰降畿內府縣悉附山東河南徧設官吏所至無違者及淮巡撫路振飛發兵拒之乃去自成謂直得天命金星率賊衆三表勸進乃從之令撰登極儀訃吉日及自成升御座忽見白衣人長數丈手劒怒視座下龍爪鬣俱動自成恐亟下鑄金璽及永昌錢皆不就聞山海關總兵吳三桂兵起乃謀歸陝西初三桂奉詔入援至山海關京師陷猶豫不進自成劫其父襄作書招之三桂欲降至灤州聞愛姬陳

沅被劉宗敏掠去憤甚疾歸山海襲破賊將自成怒親部賊十餘萬執吳襄於軍東攻山海關以別將從一片石越關外三桂懼乞降於我

大清四月二十二日自成兵二十萬陣於關內自北山亘海我兵對賊置陣三桂居右翼末悉銳卒搏戰殺賊數千人賊亦力鬪圍開復合戰良久我兵從三桂陣右突出衝賊中堅萬馬奔躍飛矢雨墮天大風沙石飛走擊賊如電自成方挾太子登高岡觀戰知為我兵急策



馬下岡走我兵追奔四十里賊衆大潰自相踐踏死者  
無算僵屍徧野溝水盡赤自成奔永平我兵逐之三桂  
先驅至永平自成殺吳襄奔還京師時牛金星居守諸  
降人往謁執門生禮甚恭金星曰訛言方起諸君宜簡  
出由是降者始懼多竄伏矣自成至悉鎔所拷索金及  
宮中帑藏器皿鑄為餅每餅千金約數萬餅騾車載歸  
西安二十九日丙戌僭帝號於武英殿追尊七代皆為  
帝后立妻高氏為皇后自成被冠冕列仗受朝金星代

行郊天禮是夕焚宮殿及九門城樓詰旦挾太子二王西走而使偽將軍左光先谷可成殿五月二日我

大清兵入京師下令安輯百姓為帝后發喪議謚號遣將偕三桂追自成時福王已監國南京大學士史可法督師討賊自成至定州我兵追之與戰斬谷可成左光先傷足賊負而逃自成西走真定益發衆來攻我兵復擊之自成中流矢創甚西踰故關入山西會我兵東返自成乃鳩合潰散走平陽李巖者故勸自成以不殺收

人心者也及陷京師保護懿安皇后令自盡又獨於士大夫無所拷掠金星等大忌之定州之敗河南州縣多反正自成召諸將議巖請率兵往金星陰告自成曰巖雄武有大畧非能久下人者河南巖故鄉假以大兵必不可制十八子之讖得非巖乎因譖其欲反自成令金星與巖飲殺之賊衆俱解體自成歸西安復遣賊陷漢中降總兵趙光遠進畧保寧時獻忠以兵拒之乃還八月建祖禰廟成將往祀忽寒慄不能就禮自成始以巖

言謬為仁義及巖死又屢敗復強很自用偽尚書張第  
元耿始然皆以小忤死制銅鑊官吏坐賊即鑊斬民盜  
一鷄者死西人大懼

順治二年二月我兵攻潼關偽伯馬世耀以六十萬衆  
迎戰敗死潼關破自成遂棄西安由龍駒寨走武岡入  
襄陽復走武昌我兵兩道追躡連蹙之鄧州承天德安  
武昌窮追至賊老營大破之者八當是時左良玉東下  
武昌虛無人自成屯五十餘日賊衆尚五十餘萬改江

夏曰瑞符縣尋為我兵所迫部衆多降或逃散自成走  
延寧蒲圻至通城竄於九宮山秋九月自成留李過守  
寨自率二十騎畧食山中為村民所困不能脫遂縊死  
或曰村民方築堡見賊少爭前擊之人馬俱陷泥淖中  
自成腦中鉏死剥其衣得龍衣金印眇一目村民乃大  
驚謂為自成也時我兵遣識自成者驗其尸朽莫辨獲  
自成兩從父偽趙侯偽襄南侯及自成妻妾二人金印  
一又獲偽汝侯劉宗敏偽總兵左光先偽軍師宋獻策

於是斬自成從父及宗敏於軍牛金星宋企郊等皆遁  
亡自成兄子過改名錦偕諸賊帥奉高氏降於總督何  
騰蛟時唐王立於閩賜錦名赤心封高氏忠義夫人號  
其軍曰忠貞營隸騰蛟麾下永明王時赤心封興國侯  
尋死

張猷忠者延安衛柳樹澗人也與李自成同歲生長隸  
延綏鎮為軍犯法當斬主將陳洪範奇其狀貌為請於  
總兵官王威釋之乃逃去崇禎三年陝西賊大起王嘉

允據府谷陷河曲獻忠以米脂十八寨應之自號八大王明年嘉允死其黨王自用復聚衆三十六營獻忠及高迎祥羅汝才馬守應皆為之渠其冬洪承疇遣為總督獻忠及汝才皆就撫已而叛入山西偕羣賊焚掠尋擾河北又偕渡河是自陝西河南湖廣四川江北數千里地皆被蹂躪當此之時賊渠率衆無專主遇官軍人自為鬪勝則爭進敗則竄山谷不相顧官軍遇敗追殺亦不知所逐何賊也賊或分或合東西奔突勢日強盛

八年十三家會滎陽議敵官軍守應欲北渡獻忠嗤之  
守應怒李自成為解乃定議獻忠始與高迎祥並起作  
賊自成乃迎祥偏裨不敢與獻忠並及是遂相頡頏與  
俱東掠連破河南江北諸縣焚皇陵已而迎祥自成西  
去獻忠獨東圍廬州舒城俱不下攻桐城陷廬江屠巢  
無為潛山太湖宿松諸城應天巡撫張國維禦之獻忠  
從英霍迨道麻城合守應等入關會迎祥分鳳翔已復  
出商洛屯靈寶以待迎祥迎祥至則合兵復東總兵官



左良玉祖寬擊之獻忠與迎祥分道走寬追獻忠戰於  
嵩縣及九臯山三戰皆克俘斬甚衆獻忠恚再合迎祥  
衆還戰復大敗迎祥尋與自成入陝西而守應汝才諸  
賊各盤踞鄖陽商洛山中不能救獻忠亦遁山中明年  
秋總督盧象昇去苗胙土巡撫湖廣不習兵於是獻忠  
自均州守應自新野蝎子塊自唐縣並犯襄陽衆二十  
餘萬總兵秦翼明兵寡不能禦湖廣震動獻忠糾汝才  
守應及闔塌天諸賊順流東下與江北賊賀一龍賀錦

等合烽火達淮揚南京兵部尚書范景文操江都御史黃道直總兵官楊御蕃分汛固守安池道副使史可法親率兵當賊衝賊從間道犯安慶連營百里巡撫國維告警詔左良玉馬燬劉良佐合兵援之遂大破賊賊走潛山之天王古寨國維檄良玉搜山良玉不應尋北去賊乃復出太湖連蕪黃敗官軍於鄆家店殺參將程龍陳於王等四十餘人會總兵官牟文綬偕良佐來援復破賊賊皆遁獻忠入湖廣是時河南湖廣賊十五家惟

獻忠最狡黠驍勅次則汝才獻忠嘗偽為官兵欲給宛  
城良玉適至獻忠倉皇走前鋒羅岱射之中額良玉馬  
追及刃拂獻忠面馬馳以免會熊文燦為總理刊檄撫  
賊闖塌天者本名劉國能與獻忠有卻詣文燦降獻忠  
創甚不能戰大恐十一年春偵知陳洪範隸文燦麾下  
為總兵大喜因遣門齋重幣獻洪範曰獻忠蒙公大恩  
得不死公豈忘之邪願率所部降以自效洪範亦喜為  
告文燦受其降巡按御史林銘球分巡道王瑞耒與良

王謀俟獻忠至執之文燦不可獻忠遂據穀城請十萬人餉文燦不敢決時羣賊皆聚南陽屠掠旁州縣文燦赴裕州益大發檄撫賊汝才以戰敗乞降於太和山監軍太監李繼改名年射塌天混十萬過天星關索王光恩等十三家渠帥先後俱降陝西總督洪承疇巡撫孫傳庭復大破李自成自成竄嶠函山中朝廷皆謂賊撲剪殆盡獻忠在穀城訓卒治甲仗言者頗疑其欲反帝方信兵部尚書楊嗣昌言謂文燦能辦賊不復憂也夏

五月獻忠叛殺知縣阮之鈿隳殺城陷房縣合汝才兵  
殺知縣郝景春十三家降賊一時並叛惟王光恩不從  
獻忠去房縣左良玉追擊之羅岱為前鋒至羅漢山岱  
忠伏死良玉大敗嗣昌已拜大學士乃自請督師帝大  
悅十月朔嗣昌至襄陽集諸將議進兵時羣賊大掠賀  
一龍賀錦犯隴應麻黃與官軍相持汝才及過天星竄  
伏漳房興遠獻忠踞湖廣四川界將西犯嗣昌視東畧  
稍緩乃宿輜重襄陽濬濠築城甚固令良玉專力勦獻

忠十三年閏正月良玉擊賊枸坪關獻忠遁追至瑪瑙  
山賊據山拒敵良玉先登賀人龍李國奇夾擊大敗之  
斬首千三百餘級禽獻忠妻妾湖廣將張應元汪之鳳  
追敗之水右壩川將張令方國安又邀擊於岔溪獻忠  
奔柯家坪張令逐北深入被圍應元之鳳援之復破賊  
獻忠率千餘騎竄興歸山中勢大蹙初良王之進兵也  
與嗣昌議不合獻忠遣間說良玉良玉乃圍而弗攻獻  
忠因得與山民市鹽芻米酪收潰散掩旗息鼓益西走

白羊山時汝才及過天星從寧昌窺大昌巫山欲渡江  
為官兵所扼獻忠至遂與之合獻忠雖累敗氣益盛立  
馬江岝有不前赴者輒戮之賊爭死鬪官軍退走賊畢  
渡屯萬頃山歸巫大震已而汝才過天星犯開縣不利  
汝才東走過天星復軼開縣而西諸將徃復追逐獻忠  
乃悉衆攻楚兵於土地嶺副將潘之鳳戰死遂陷大昌  
進屯開縣張令戰死石砭女土司秦良玉亦敗汝才復  
自東至與獻忠轉趨達州川撫卽捷春退扼涪江賊北

陷劔州將入漢中總兵官趙光遠賀人龍守陽平百丈  
險賊不得過乃復走巴西涪江師潰捷春論死獻忠屠  
緜州越成都陷瀘州北渡陷永州走漢州得陽入巴州  
又自巴走達州復至開縣先是嗣昌聞賊入川進駐重  
慶監軍萬元吉日賊或東窺不可無備宜分中軍間道  
出梓潼扼歸路嗣昌不聽擬令諸將盡赴瀘州追賊十  
四年正月總兵猛如虎參將劉士傑追之開縣之黃陵  
城賊遠戰官軍大敗士傑及遊擊郭開等皆死獻忠果



東出令汝才拒鄖撫袁繼成兵自率輕騎一日夜馳三百里殺督帥使者於道取軍符給陷襄陽城獻忠縛襄王頊銘置堂下屬之酒曰我欲借王頭使楊嗣昌以陷藩誅王其努力盡此酒遂殺之并殺鄖襄道張克儉推官鄭曰廣復得其所失妻妾又去陷樊城當陽郟合汝才入光州殘商城羅山息縣信陽固始分軍犯茶山應城陷隨州偽張良玉幟入泌陽再攻應山不克去攻鄖陽守將王光恩力戰始解又拔鄖西羣盜附者萬計遂

東畧地獻忠自瑪瑙定敗心畏良玉及屢勝又有驕色  
秋八月良玉追擊之信陽大破之降賊衆數萬獻忠傷  
股乘夜東奔良玉急追之會大雨江溢道絕官軍不能  
進獻忠走免已復出商城將向英山又為副將王允成  
所破衆道散且盡從騎止數十時汝才已先與自成合  
獻忠遂投自成自成以部曲遇之不從自成欲殺之汝  
才諫曰留之使擾漢南分官軍兵力乃陰與獻忠五百  
騎使遁去道糾土賊一斗殺瓦罐子等衆復盛然猶佯

推自成先是賊營革左二賀陷含巢潛諸縣欲西合獻  
忠以湖廣官兵沮不得達及汴圍急督帥丁啟睿及左  
良玉皆往援汴獻忠乘間陷亳州入英霍山中與革左  
二賀相見皆大喜明年合攻陷舒城六安掠民益軍陷  
廬州知府鄭履祥死陷無為廬江習水師於巢湖太監  
廬九德以總兵官黃得功劉良佐之兵戰於夾山敗績  
江南大震鳳陽總督高斗光安慶巡撫鄭二陽逮治詔  
起馬士英代斗光是秋得功良佐大破賊於潛山獻忠

腹心婦豎盡走蘄水革左二賀北投自成已獻忠復襲  
陷太湖會良玉避自成東下盡撤湖廣兵自從獻忠聞  
之又襲陷黃梅十六年春連陷廣濟蘄州蘄水入黃州  
黃民盡逃乃驅婦女剽城尋殺之以填塹麻城人湯志  
者大姓奴也殺諸生六十人以城降賊獻忠改麻城為  
州又西陷漢陽全軍從鴨蛋洲渡陷武昌執楚王華奎  
籠而沈諸江盡殺楚宗室錄男子二十以下十五以上  
為兵餘皆殺之由鸚鵡洲至道士洑浮觜蔽江踰月人

脂厚累寸魚鼈不可食獻忠遂僭號改武昌曰天授府  
江夏曰上江縣據楚王第鑄西王之寶偽設尚書都督  
巡撫等官開科取士以興國州柯陳兩姓土官悍勇招  
降之題詩黃鶴樓下令發楚邸金振饑民斬黃等二十  
一州縣悉附時李自成在襄陽聞之忌且怒貽書譙責  
左良玉兵復西上偽官吏多被禽殺獻忠懼乃悉衆趨  
岳州長沙於是監軍道王瓚沔陽知州章曠武昌生員  
程天一白雲寨長易道三皆起兵討賊斬黃漢陽三府

皆反正獻忠遂陷咸寧蒲圻岳州沅撫李乾德總兵  
孔希貴等據陳陵磯拒戰三戰三克殲其前部獻忠怒  
百道並進乾德等不支皆走岳州陷獻忠欲渡洞庭湖  
卜於神不吉投玦而詢將渡風大作獻忠怒連巨舟千  
艘載婦女焚之水光夜如晝騎而逼長沙巡按劉熙祚  
奉吉王惠王走衡州總兵尹先民降長沙陷尋破衡州  
吉王惠王桂王俱走永州乃拆桂府材載至長沙造偽  
殿而自追三王於熙祚命中軍護三王入廣西身入

永死守城陷見殺又陷寶慶常德發故督師楊嗣昌祖墓斬其屍見血攻道州守備沈至緒戰歿其女再戰奪父屍還城獲全遂東犯江西陷吉安袁州建昌撫州永新安福萬載南豐諸府縣廣東大震南部屬城官民盡逃賊有獻計取吳越者獻忠憚良玉在不聽決策入川中十七年春陷夔州至萬縣水漲留屯三月已破涪州敗守道劉麟長總兵曹英兵進陷佛圖關破重慶瑞王常浩遇害是日天無雲而雷賊有震者獻忠怒發巨砲

與天角遂進陷成都蜀王至澍率妃夫人以下投於井  
巡撫陳士奇被殺是時我

大清兵已定京師李自成遁歸西安南京諸臣尊立福  
王命故大學士王應熊督川湖軍事兵力弱不能討賊  
獻忠遂僭號大西國王改元大順冬十一月庚寅即偽  
位以蜀王府為官名成都曰西京用汪兆麟為左丞相  
嚴錫命為右丞相設六部五軍都督府等官王國麟江  
鼎鎮龔完敬等為尚書養子孫可望艾能奇劉文秀李



定國等皆為將軍賜姓張氏分徇諸府州縣悉陷之保  
寧順慶先已降自成置官吏獻忠悉逐去自成發兵攻  
不克遂據有全蜀惟尊義一郡及黎州土司馬金堅不  
下獻忠黃面長身虎額人號黃虎性狡譎嗜殺一日不  
殺人輒悒悒不樂詭開科取士集於青羊宮盡殺之筆  
墨成坵塚坑成都民於中園殺各衛籍軍九十八萬又  
遣四將軍分屠各府縣名草殺偽官朝會拜伏呼焚數  
十下殿焚所饟者引出斬之名天殺又創生剝皮法皮

未去而先絕者刑者抵死將卒以殺人多少叙功次共  
殺男女六萬萬有奇賊將有不忍至縊死者偽都督張  
君用王明等數十人皆坐殺人少剝皮死并屠其家脅  
川中士大夫使受偽職叙州布政使尹伸廣元給事中  
吳宇英不屈死諸受職者後尋亦皆見殺其慘虐無人  
理不可勝紀又用法移錦江涸而闕之深數丈埋金寶  
億萬計然後決堤放流名水藏曰無為後人有也當是  
時曾英李占春于大海王祥楊展曹勛等義兵並起故

獻忠誅殺益毒川中民盡乃謀窺西安

順治三年獻忠盡焚成都宮殿廬舍夷其城率衆出川  
北又欲盡殺川兵偽將劉進忠故統川兵聞之率一軍逃  
會我

大清兵至漢中進忠來奔乞為鄉導至鹽亭界大霧獻  
忠曉行猝遇我兵於鳳凰坡中矢墜馬蒲伏積薪下於  
是我兵禽獻忠出斬之川中目遭獻忠亂列城內雜樹  
成拱狗食人肉若猛獸虎豹齧人死輒棄去不盡食也

民逃深山中草衣木食久徧體皆生毛獻忠既誅賊黨  
可望能奇文秀定國等潰入川南殺曾英李乾德等後  
皆降於永明王

明史卷三百九

欽定四庫全書

明史卷三百九考證

李自成傳喬應甲為陝西巡撫朱童蒙為延綏巡撫貪黷不詰盜盜由是始

臣

嚴福按綏冠紀略陝西喬

應甲貪婪狂易法紀廢弛有道臣袁養和被劫請捕盜應甲反脅取養和千金延綏朱童蒙援則軍廩助三殿大工兵民側目謹附考

李自成傳自成乃與兄子往從迎祥

臣

嚴福按綏冠

紀略自成妻韓氏故娼也與縣役蓋君祿通自成殺  
淫者偕李通亡命甘州投寸督梅之煥所部叅將王  
國為兵國泰調遣過金縣兵譚自成縛縣令索餉并  
殺國遂反會高迎祥自號國王自成往從之

李自成傳金堂典史潘夢科臣嚴福按忠義傳作潘

孟科與此互異

張獻忠傳文燦受其降臣嚴福按綏寇紀略獻忠既

降文燦責賂黃金䟽裏千珠琲盈斗他懷貨累萬萬

而獻忠偏將韓城人薛姓者首輔薛國觀之子姪行  
也是一騎出入國觀府中且徧見權貴人自國觀以  
下無不受其賂者

張獻忠傳推官鄺曰廣

臣嚴福按明紀事本末作鄺

曰廣

明史卷三百九考證



欽定四庫全書薈要卷六千九百三

史部

明史卷三百十

大學士張廷玉等奉 敕修

列傳第一百九十八

土司

西南諸蠻有虞氏之苗商之鬼方西漢之夜郎靡莫邛  
笮僰爨之屬皆是也自巴夔以東及湖湘嶺嶠盤踞數  
千里種類殊別歷代以來自相君長原其為王朝役使

自周武王時孟津大會而庸蜀羌髳微盧彭濮諸蠻皆  
與焉及楚莊躋王渚而秦開五尺道置吏沿及漢武置  
都尉縣屬仍令自保此即土官土吏之所始歟迨有明  
踵元故事大為恢拓分別司郡州縣額以賦役聽我驅  
調而法始備矣然其道在於羈縻彼大姓相擅世積威  
約而必假我爵祿寵之名號乃易為統攝故奔走惟命  
然調遣日繁急而生變恃功怙過侵擾益深故厯朝徵  
發利害各半其要在於撫綏得人恩威兼濟則得其死

力而不足為患實錄載成化十八年馬平主簿孔性善言溪峒蠻獠雖常梗化亂豈無因昔陳景文為令徭獠皆應差徭厥後撫字乖方始仍反側誠使守令得人示以恩信諭以禍福亦當草心帝嘉納之惜未能實究其用此可為治蠻之寶鑑矣嘗考洪武初西南夷來歸者即用原官授之其土官銜號曰宣慰司曰宣撫司曰招討司曰安撫司曰長官司以勞績之多寡分尊卑之等差而府州縣之名亦往往有之襲替必奉朝命雖在萬

里外皆赴闕授職天順末許土官繳呈勘奏則威柄漸弛成化中令納粟備振則規取日陋孝忠雖發憤釐革而因循未改嘉靖九年始復舊制以府州縣等官隸驗封宣慰招討等官隸武選隸驗封者布政司領之隸武選者都指揮領之於是文武相維比於中土矣其間叛服不常誅賞互見茲據其事蹟尤著者列於篇

湖廣土司

湖南古巫郡黔中地也其施州衛與永保諸土司境介

於岳辰常德之西與川東巴夔相接壤南通黔陽谿峒  
深阻易於寇盜元末滋甚陳友諒據湖湘間瞰以利資  
其兵為用諸苗亦為盡力有乞兵旁寨為之驅使者友  
諒以此益肆及太祖殲友諒於鄱陽進克武昌湖南諸  
郡望風歸附元時所置宣慰安撫長官司之屬皆先後  
迎降太祖以原官授之已而梗化洪武三年茲利安撫  
使覃垕連構諸蠻入寇征南將軍周德興平之五年復  
命鄧愈為征南將軍率師平散毛等三十六洞而副將

軍吳良復平五開古州諸蠻凡二百二十三洞籍其民

一萬五千收集潰散士卒四千五百餘人平其地未幾

五開五谿諸蠻亂討平之十八年五開蠻吳面兒反勢

獷甚命楚王楨將征南將軍湯和擊斬九谿諸處蠻獠

俘獲四萬餘人諸苗始懼而靖沅道澧之間十年內亦

尋起尋滅雖開國之初師武臣力實太祖控制之道恩

威備焉永樂初苗告繼絕襲冠帶益就銜勤垂百年而

五開銅鼓間又紛紛多警時英宗北狩中原所在侵擾

苗勢殊熾景泰初總兵官宮聚奏蠻賊西至貴州龍里東至湖廣沅州北至武岡南至播州之境不下二十萬圍困焚掠諸郡邑臣所領官軍不及二萬前後奔赴不能解平越之圍乞急調京邊軍及征麓川卒十萬前來以資調遣久而師徵不至更易他帥浸淫六七載至天順元年總督石璞調總兵官方瑛始剋期征勦破天堂小坪墨溪二百二十七寨禽偽王侯伯等百餘人斬賊首千四百餘級奪回軍人男婦千三百餘口於是苗患

漸平蓋萌發於貴州而蔓衍於湖南皆生苗為梗諸土  
司初無動搖而永保諸宣慰世席富強每遇征伐輒願  
荷戈前驅國家亦賴以捷伐故永保兵號為號雄嘉隆  
以還徵符四出而湖南土司均備臂指矣

施州

施南宣撫司  
忠建宣撫司

散毛宣撫司  
容美宣撫司

永順軍民宣慰使司

保靖州軍民宣慰使司

施州隋為清江郡改施州明初仍之洪武十四年改置  
施州衛軍民指揮使司屬湖廣都司領軍民千戶所一



曰大田領宣撫司三曰施南曰散毛曰忠建領安撫司  
八曰東鄉五路曰忠路曰忠孝曰金峒曰龍潭曰大旺  
曰忠峒曰高羅領長官司七曰搖把峒曰上愛茶峒曰  
下愛茶峒曰劍南曰木冊曰鎮南曰唐崖領蠻夷長官  
司五曰鎮遠曰隆奉曰西坪曰東流曰臘壁峒又有容  
美宣撫司者亦在境內領長官司四曰椒山瑪瑙曰五  
峰石寶曰石梁下峒曰水盡源通塢平初太祖即吳王  
位甲辰六月湖廣安定宣撫使向思明遣官官硬徹律

等以元所授宣撫敕印來上請改授乃命仍置安定等處宣撫司二以思明及其弟思勝為之又置懷德軍民宣撫司一以向大旺為之統軍元帥二以南木潘仲玉為抽抽欄不用黃石三峒各置長官一以沒葉大蟲硬徹律為之斡坪洞設元帥府一以向顯祖為之梅梓麻寮二洞各置長官一以向思明唐漢明為之皆新降者丙午二月容美洞宣撫使田光寶遣弟光受等以元所授宣撫敕印來上命光寶為四川行省參政行容美洞

等處軍民宣撫司事仍置安撫元帥治之並立太平臺  
宜麻寮等十寨長官司洪武四年宣寧侯曹良臣帥兵  
取桑植容美洞元施南道宣慰使覃大勝弟大旺副宣  
慰覃大興光寶子答谷等皆來朝納元所授金虎符命  
以施州宣慰司為從三品東鄉諸長官司為正六品以  
流官參用五年忠建元帥墨池遣其子驢吾率所部溪  
洞元帥阿巨等來歸附納元所授金虎符并銀印銅章  
誥敕置忠建長官司及沿邊溪洞長官司以墨池等為

長官二月容美宣撫田光寶復遣子答谷來朝征南將  
軍鄧愈平散毛柿谿赤谿安福等三十九峒散毛宣慰  
司都元帥覃野旺上僞夏所授印十四年江夏侯周德  
興移師討水盡源通塢平散毛諸峒置施州衛軍民指  
揮使司十五年置施南宣撫司隸施州衛十七年散毛  
沿邊安撫司安撫覃野旺之子起刺來朝命為本司僉  
事景川侯曹震言散毛等洞蠻時寇掠為民患已令施  
州衛及施南宣撫覃大勝招之如負固請發兵討二十

二年命忠建宣撫田思進之子忠孝代父職時思進年八十餘乞致仕故有是命明年涼國公藍玉克散毛洞禽刺惹長官覃大旺等萬餘人置大田軍民千戶所隸施州衛以藍玉奏散毛鎮南大旺施南等洞蠻叛服不常黔江施州衛兵相去遠難應援今散毛地與大水田連宜置千戶所守禦乃改散毛為大田命千戶石山等領土兵一千五百人置所鎮之時忠建施南叛蠻結寨於龍孔玉遣指揮徐玉將兵攻之禽宣撫覃大勝餘蠻

退走玉復分兵搜之殺獲男女一千八百餘人械大勝  
及其黨八百二十人送京師磔大勝於市餘戍開元給  
衣糧遣之永樂二年復設散毛施南二長官司先是洪  
武初諸土司長官來降者皆予原官蠻苗吳面兒之難  
諸土司地多荒廢長官亦罷承襲至是故土官之子覃  
友諒等以招復蠻民請仍設治所以其戶少降為長官  
司隸大田軍民千戶所以友諒為散毛長官覃添富為  
施南長官四年改施南散毛仍為宣撫司以友諒添富

來朝故也以田應虎為龍潭安撫時應虎來朝言其祖父自宋元來俱為安撫自蠻亂併其地入散毛隔遠難治乞仍舊從之時高羅安撫田大民言招復蠻民四百餘戶乞還原職治所未冊長官田谷佐唐崖長官覃忠孝並言父祖世為安撫洪武時大軍平蜀民驚潰治所廢今谷佐等招集三百餘戶請襲許之五年鎮南長官覃興等來朝稱係世職洪武中廢今招徠蠻民三百戶乞仍舊既五峰石寶長官張再武亦以襲職請從之同

時設東鄉五路安撫以覃忠為之隸施南設石梁下峒

椒山瑪瑙水盡源通瑤平三長官司以向潮文劉再貴

唐思文為之隸容美既復設忠路忠孝金峒三安撫司

隸施州衛以覃英田大英覃添貴為之皆因洪武間蠻

亂民散廢其治今忠等以故官子姪來朝奏請復設並

從之各賜印章冠帶宣德三年設劍南長官司隸忠路

安撫搖把峒上愛下愛二茶峒三長官司及鎮遠隆奉

二蠻夷官司皆隸東鄉五路安撫東流臘壁峒二蠻夷



官司隸散毛宣撫石關峒長官司西坪蠻夷官司隸金  
峒安撫皆以其酋長為之先是忠路安撫司等各奏前  
元故土官子孫年酋蠻等各擁蠻民久據溪洞今就招  
撫請設官司授以職事兵部以聞帝以馭蠻當順其情  
所授諸司宜有等殺兵部議以四百戶以上者設長官  
司四百戶以下者設蠻夷官司元土官子孫量授以職  
從所招官司管屬皆從之令三年一朝貢如故事九年  
木冊長官田谷佐奏高羅安撫長倚勢凌轢侵奪其土

地人民已蒙朝廷分理然彼宿怨未平恐復加害乞徑  
隸施州衛從之正統三年命散毛宣撫覃友諒子瑄試  
職初友諒以罪械赴京中路逃匿後為官軍所獲斃獄  
至是本司以其子為蠻民信服及襲職帝以友諒罪重  
宜革第以蠻故詘法信恩命瑄試職圖後效景泰二年  
禮部奏散毛宣慰司副使黃縉稱瑄謀殺親兄律應斬  
其妻譚氏遣子忠等貢馬贖罪然瑄罪重不可宥宜給  
鈔以酬馬直從之天順元年容美宣撫田潮美老疾請

子保富代職從之五年禮部奏施州木冊長官司土舍  
覃文壽兇暴并造不法誹謗之言罪當刑今其母向氏  
進馬以贖恐不可從帝命給鈔百錠以慰其母其子仍  
禁錮之成化二年搖把洞長官向麥答踵奏鄰近洗羅  
峒長窺知本洞土兵調征兩廣村寨空虛煽誘土蠻攻  
劫及調官軍勦治五年禮部奏容美宣撫司田保富等  
遣人進貢方物不及數恐使者侵盜宜停其賞仍移知  
所司施州等衛八安撫司各奏成化五年朝覲進馬已

付邊衛騎操而諸衛收馬文移不至恐有虛詐宜勘實  
給賞皆從之弘治二年木冊長官田賢及容美致仕田  
保富各進馬為土人譚敬保等贖罪刑部言蠻民納馬  
贖罪輕者可原重者難宥宜下按臣察覈八年容美宣  
撫貢馬及香禮部以香不及數馬多道斃又無文驗命  
予半賞九年金峒安撫覃彥龍奏境內產杉木嘗鬻金  
三千貯庫今彥龍年老子惟一人恐身后土人爭奪乞  
解部工部議非貢典却之正德四年容美宣撫并椒山

瑪瑙長官司所遣通事劉思朝等赴京進貢沿途驛傳  
多需索為傾事所發自魯橋以北計千餘金部臣以聞  
帝以遠蠻宥之散毛宣撫并五峰石寶水盡源通塿平  
長官司入貢後期部議半賞從之九年命大田千戶所  
千戶丹霽子舜卿為指揮僉事以自陳討川寇功也十  
一年容美宣撫田秀愛其幼子將逐其兄白俚俾而以  
幼子襲白俚俾恨之賊殺其父及其弟事聞下鎮巡官  
驗治磔死土官唐勝富張世英等為白俚俾奏辨罪亦

當坐詔以蠻獠異類難盡繩以法免其並坐戒飭之十  
五年容美宣撫司同知田世英奏獲鎮南軍民府古印  
為始祖田始進開熙二年頒給乞改陞宣撫司為軍民  
府禮部議以開設宣撫頒印已久不當更古印宜繳從  
之嘉靖七年容美宣撫司龍潭安撫司每朝貢率領千  
人所過擾害鳳陽巡撫唐龍以聞禮部按舊制進貢不  
過百人赴京不過二十人命所司申飭忠孝安撫司把  
事田春者數十人稱入貢且所過文騷擾驛傳應天巡

撫以聞兵部議土司違例入貢且所過橫索恐有他虞  
宜嚴禁諭二十六年臘壁峒等長官司入貢禮部驗印  
文詐偽詔革其賞并下按臣勘問三十三年詔湖廣川  
貴總督并節制容美十四司初容美土官田世爵與土  
官向元楫累世相仇元楫幼世爵佯為講好以女嫁之  
謀奪其產因誣元楫以奸有司恐激變令自捕元楫下  
獄論死世爵遂發兵盡俘向氏并籍其土皆沒入之久  
之撫按知其謀責與元楫對狀世爵不出陰與羅峒土

舍黃中等謀叛於是湖廣巡按御史周如斗請移荆南道分巡施州衛以便控制調廣西清浪等戍軍以實行伍疏下督臣馮岳等議岳等言施州地勢孤懸不可久居戍軍亦非一時可集當移荆瞿守備於施州九永守備於九谿上荆南道備巡歷至世爵驕橫有司不能攝治獨久繁元楫何為宜假督臣以節制容美之權問世爵抗違之罪如不悛即繩以法從之時龍潭安撫黃俊素貪暴據支羅洞寨以睚眦殺人繫獄會白草番反俊



子中請立功為父贖罪已又自求為副指揮賄當事者  
許之俊出益驕乃與中及羣盜李仲實等恣行於四川  
之雲南奉節間副使熊達等計禽俊與仲實俊死於獄  
中自縛出降執餘黨譚景雷等自贖帝命追戮俊梟示  
仲實等論斬中謫戍而賞有功者三十五年命容美宣  
撫田九霄襲職賜紅紵衣一襲以浙江黃宗山擊倭之  
功也隆慶元年吏科給事朱繪等言湖廣施州衛忠路  
安撫覃大寧一日奏五上語多不實請究治都察院議

金峒安撫土舍覃壁爭印相殺及磁峒不當轄四川俱  
下撫按官勘報四年覃壁作亂傷官軍撫按請治失事  
諸臣罪兵部言本衛孤懸境外事起倉猝宜從寬貫以  
責後功帝然之命所司相機勦撫五年巡撫劉懋以覃  
壁平條議五事一請以川東所轄巫山建始黔江萬縣  
改屬上荆道一以荊州去施州衛遠不便巡歷夷陵西  
有傳友德所闢取蜀故道名百里荒者抵衛僅五百餘  
里請以巴東之石碚司巡檢施州衛之州門驛三會驛

並移近地俾閭井聯絡而於百里荒及東卜壠仍創建  
哨堡令千戶一員督班軍百人戍守一施州衛延袤頗  
廣物產最饒衛官朘削致民逃夷地爲亂宜裁通判設  
同知撫治民蠶均平徭賦勿額外橫索一金峒世官不  
宜遽絕貸覃勝罪降安撫爲峒長聽支羅所百戶提調  
一施州所轄十四司應襲官舍必先白道院始許理事  
其擅立名號者請嚴治并令兵巡道每歲經歷施州豫  
行調集各官舍獎諭令赴學觀化俱從之萬厯十一年

湖廣撫按奏施州衛施南等宣撫司各官仍聽鎮筸參將節制載入刺書以一事權從之崇禎十二年容美宣撫田元疏言六月間穀賊復叛撫治兩臣調用土兵臣即捐行糧戰馬立遣土兵七千令副長官陳一聖等將之前行悍軍鄧維昌等憚於征調遂與譚正賓結七千二村鳩銀萬七千兩賂巴東知縣蔡文陞以逼民從軍之文上報阻忠義而啓邊釁帝命撫按核其事時中原寇盜充斥時事日非即土司徵調不至亦不能問矣

永順漢武陵隋辰州唐溪州地也宋初為永順州嘉祐中溪州刺史彭仕義叛臨以大兵仕義降熙寧中築下溪州城賜名會溪元時彭萬潛自改為永順等處軍民安撫司洪武五年永順宣慰使順德汪倫堂厓安撫使月直遣人上所受偽夏印詔賜文綺襲衣六年置永順等處軍民宣慰使司隸湖廣都指揮使司領州三曰南渭曰施溶曰上谿長官司六曰臘惹洞曰麥著黃洞曰驢遲洞曰施溶溪曰白崖洞曰田家洞九年永順宣慰

彭添保遣其弟義保等貢馬及方物賜衣帛有差自是  
每三年一入貢永樂十六年宣慰彭源之子仲率土官  
部長六百六十七人貢馬宣德元年禮部以永順宣慰  
彭仲子英朝正後期請罪之帝以遠人不無風濤疾病  
之阻仍賜予如例總兵官蕭綏奏酉陽宋農里石提洞  
軍民被臘惹洞長謀古賞等連年攻劫又及後溪招之  
不從乞調兵勦之謀古賞等懼願罰人馬贖罪乃罷兵  
正統元年命彭仲子世雄襲職天順二年諭世雄調土

兵會勦貴州東苗成化三年兵部尚書程信請調永順  
兵征都掌蠻十三年以征苗功命宣慰彭顯英進散官  
一階仍賜敕獎勞十五年免永順賦弘治七年貴州奏  
平苗功以宣慰彭世騏等與有勞世騏乞陞職兵部言  
非例請進世騏階昭勇將軍仍賜勅褒獎從之八年世  
騏進馬謝恩十四年世騏以北邊有警請帥土兵一萬  
赴延綏助討賊兵部議不可賜勅獎諭并賜奏事人路  
費鈔千貫免其明年朝覲以方聽調征賊婦米魯故也

正德元年以世騏從征有功賜紅織金麒麟服世騏進馬謝恩二年進馬賀立中宮命給賞如例五年永順與保靖爭地相攻累年不決訴於朝命各罰米三百石六年四川賊藍廷瑞鄺本恕等及其黨二十八人倡亂兩川烏合十餘萬人僭王號置四十八營攻城殺吏流毒黔楚總制尚書洪鍾等討之不克已而為官軍所遏乏食乃佯聽撫劫掠自如廷瑞以女結婚於永順土舍彭世麟募緩兵世麟偽許之因與約期廷瑞本恕及王金



珠等二十八人皆來會世麟伏兵禽之餘賊潰渡河官兵追圍之禽斬及溺死者七百餘人總制巡撫以捷聞獎賚有差論者以是役世麟為首功云七年賊劉三等自遂平趨東臯宣慰彭明輔及都指揮曹鵬等以土軍追擊之賊倉卒渡河溺死者二千人斬首八十餘級巡撫李自實以聞命永順宣慰格外加賞仍給明輔誥命十年致仕宣慰彭世麒獻大木三十次者二百親督運至京子明輔所進如之賜敕褒諭賞進奏入鈔千貫十

三年世麒獻大楠木四百七十子明輔亦進大木備營  
建詔世麒陞都指揮使賚蟒衣三襲仍致仕明輔授正  
三品散官賞飛魚服三襲賜敕獎勵仍令鎮巡官宴勞  
之時政出權倖恩澤皆由於干請於是郴州民頌世麒  
征賊時號令嚴明其土官彭芳等亦頌世麒功乞蟒衣  
玉帶兵部格不可乃已世麒辭賞請立坊賜名曰表勞  
會有保靖兩宣慰爭兩江口之議詞連明輔主者議逮  
治明輔乃令蠻民奏其從征功悉辭香鑪山應得陞賞

以贖逮治之辱部議悉已之嘉靖六年論禽岑猛功免  
應襲宣慰彭宗漢赴京而加宗漢父明輔祖世麒銀幣  
二十一年巡撫陸傑言酉陽與永順以採木仇殺保靖  
又煽惑其間大為地方患乃命川湖撫臣撫戢勿釀兵  
端是年免永順秋糧三十三年冬調永順土兵協勦倭  
賊於蘇松明年永順宣慰彭翼南統兵三千致仕宣慰  
彭明輔統兵二千俱會於松江時保靖兵敗賊於石塘  
灣永順兵邀擊賊奔王江涇大潰保靖兵最永順次之

帝降敕獎勵各賜銀幣翼南賜三品服先是永順兵勦  
新場倭倭故不出保靖兵為所誘遽先入永順土官田  
苗田豐等亦爭入為賊所圍皆使之議者皆言督撫經  
畧失宜致永順兵再戰再北及王江涇之戰保靖倚之  
永順角之斬獲一千九百餘級倭為奪氣蓋東南戰功  
第一云時邀功者方行賞翼南遂授昭毅將軍已陞右  
參政管宣慰事與明輔俱受銀幣之賜時保永二宣慰  
破倭後兵驕所過皆劫掠緣江上下苦之御史請究治

部議以土兵新有功遽加罰失遠人心宜諭責之并令  
浙直練鄉勇嗣後不得輕調土兵四十二年以獻大木  
功再論賞加明輔都指揮使賜蟒衣其子掌宣慰司事  
右參政彭翼南為右布政使賜飛魚服仍賜敕獎勵四  
十四年永順復獻大木詔加明輔翼南二品服萬厯二  
十五年東事棘調永順兵萬人赴援宣慰彭元錦請自  
備衣糧聽調既而支吾有要挾之迹命罷之三十八年  
賜元錦都指揮銜給蟒衣一襲妻汪氏封夫人四十七

年永順貢馬後期減賞兵部言前調宣慰元錦兵三千人援遼已半載到關者僅七百餘人命究主兵者四十八年進元錦都督僉事先是元錦以調兵三千為不足立功願以萬兵往朝廷嘉其忠加恩優渥既而檄調八千僅以三千塞責又上疏稱病為巡撫所劾得旨切責元錦不得已行兵抵通州北聞三路敗衄遂大潰於是巡撫徐兆魁言調永順兵八千費踰十萬今奔潰虛糜無益罷之

保靖唐溪州地宋置保靜州元為保靖州安撫司明太祖之初起也安撫使彭世雄率其屬歸附命仍為保靖安撫使洪武元年保靖安撫使彭萬里遣子德勝奉表貢馬及方物詔陞安撫司為保靖宣撫司以萬里為之隸湖廣都指揮使司自是朝貢如制永樂元年以保靖族屬大蟲可宜等互仇殺遣御史劉從政齎敕撫諭之三年辰州衛指揮龔能等招諭篁子坪等三十五寨生苗廖彪等各遣子入貢因設篁子坪長官司以彪為之

隸保靖九年宣慰彭勇烈遣人來貢十二年算子坪賊

吳者泥自稱苗王與蠻民苗金龍等為亂總兵梁福平

之未幾也泥子吳擔竹復誘苗吳亞麻糾貴州答意諸

蠻叛都督蕭授斬平之二十一年宣慰彭樂哈俾遣人

貢馬宣德元年宣慰彭大蟲可宜遣子順來貢四年兵

部奏保靖舊有二宣慰一為人所殺一以殺人當死其

同知以下官皆缺請改流官治之帝以蠻性難馴流官

不諳土俗令都督蕭授擇衆所推服者以聞正統十四



年保靖宣慰與族人彭南木答等相訐奏既而欲講和願輸米贖誣奏罪從之景泰七年命調保靖土兵協勦銅鼓五開黎平諸蠻先頒賞犒之天順二年敕宣慰彭捨怕俾即選兵進討三年保靖奏夏災成化二年以保靖宣慰彭顯宗征蠻有功命給誥命三年復調保靖兵征都掌蠻五年免保靖宣慰諸土司成化二年稅糧八百五十三石以屢調征廣西及荆襄貴州有功也七年顯宗老不任事命其子仕瓏代十三年以平苗功顯宗仕

璫皆進一階十五年以災免保靖租賦仕璫奏兩江口  
長官彭勝祖違例進貢下部臣議宜逮問命鎮巡官諭  
之弘治十二年永順宣慰司奏仕璫擅率兵攻長官彭  
世英仇殺多年構禍不已乞發兵征勦部覆以屢行按  
問不報宣諭鎮巡官速勘奏聞從之十七年以保靖宣  
慰等方聽調免明年朝覲時有征貴州賊婦米魯之役  
故也初保靖安撫彭萬里以洪武六年歸附即其地設  
保靖宣慰司授萬里宣慰使領白崖大別大江小江等

二十八村寨萬里卒子勇烈卒子藥卒子藥哈俾嗣年  
幼萬里弟麥谷踵之子大蟲可宜諷土人奏已為副宣  
慰同理司事因殺藥哈俾據其十四寨事覺逮問死獄  
中革副宣慰而所據寨如故其後勇烈之弟勇傑嗣傳  
子南木杵孫顯宗曾孫仕瓏與大蟲可宜之子忠忠子  
武武子勝祖及其子世英代為仇敵而武以正統中隨  
征有功授兩江口長官勝祖成化中亦以功授前職並  
隨司理事無印署弘治初勝祖以年老世英無官恐仕

瓏奪其地援例求世襲奏行覈實仕瓏輒沮之以是仇  
恨益甚兩家所轄土人亦各分黨仇殺永順宣慰使彭  
世麒取勝祖女復左右之以是互相攻擊奏訴無寧歲  
弘治十年巡撫沈暉奏言令世英入粟嗣父職將以平  
之而仕瓏奏許不止是時敕調世英從征貴州而兵部  
移文有兩江口長官司字仕瓏疑世英得設官署將不  
聽約束復奏言之於是巡撫閻仲宇巡按王約等請以  
前後章奏下兵部都察院議令世英歸所據小江七寨

於仕瓏止領大江七寨聽仕瓏約束其原居兩江口係襟喉要地請調清水溪堡官兵守之而徙世英於沱埠以絕爭端以後土官應襲子弟悉令入學漸染風化以格頑冥如不入學者不准承襲世麒黨於世英法當治但從征湖廣頗効忠勤已有旨許以功贖仕瓏世英並逮問勝祖照常例發遣奏上從之弘治十六年六月事也正德十四年保靖兩江口土舍彭惠既以祖大蟲可宜與彭藥哈俾世仇至是與宣慰彭九霄復構怨永順

宣慰彭明輔與之連姻助以兵力遂與九霄往復仇殺數年不息死者五百餘人前後訐奏累八十餘章守巡官繫惠於獄明輔率衆劫之去尋復捕繫事聞詔都御史吳廷舉勘處廷舉乃令鎮巡議以為惠罪當誅但土蠻難盡以法繩宜徙惠置辰常城中令九霄出價以易兩江口故地仍用文官左遷者二人為首領官以勸相之俟數年後革心向化請敕獎諭仍擢用為首領下兵部議以惠徙內地恐貽後患令廷舉再議於是廷舉等

復請以大江之右五寨歸保靖大江之左二寨屬辰州  
設大刺巡檢司流官一人主之惠免遷徙仍居沱埠以  
土舍名目協理巡檢事部覆如廷舉言嘉靖六年以禽  
岑猛功進九霄湖廣參政賜銀幣長子虎臣戰歿贈指  
揮僉事次子良臣襲職時免赴京二十六年免保靖秋  
糧三十三年詔調宣慰彭蓋臣帥所部三千人赴蘇松  
征倭明年遇倭於石塘灣大戰敗之賊北走平望諸軍  
尾之於王江涇大破之錄功以保靖為首敕賜蓋臣銀

幣并三品服令統兵益擊賊先是都司李經率保靖兵追倭至新場倭二千人伏不出保靖土舍彭翅引軍探之中伏與所部皆死贈翅一官并賜棺殮具及至以王江湓捷進蓋臣為昭毅將軍既又調保靖土兵六千赴總督軍前從胡宗憲請也時已叙趙文華宗憲功復加蓋臣右參政管宣慰司事仍賞銀幣萬厯四十七年調保靖兵五千命宣慰彭象乾親統援遼四十八年加象乾指揮使象乾至涿州病中夜兵逃散者三千餘人部



臣以聞帝嚴旨責統兵者并敕監軍道沿途招撫明年象乾病不能行遣其子姪率親兵出關戰於渾河全軍皆歿天啟二年進象乾都督僉事贈彭象周彭緄彭天祐各都司僉事以渾河之役一門殉戰義烈為諸土司冠云

明史卷三百十

欽定四庫全書

明史卷三百十考證

施州傳蠻苗吳面兒之難諸土司地多荒廢

臣嚴福

按明紀事本末洪武十八年吳面兒判是時諸蠻出沒不常楚王禎及湯和等抵其地恐蠻人驚潰乃于諸洞分屯立柵與蠻民雜耕使不復疑久之以計擒其渠魁餘黨悉潰師還留兵鎮之

施州傳中謫戍

臣

嚴福按毛奇齡蠻司合志中逃歸

舊巢築牛欄坪寨守之號天城自稱天城王流劫奉  
節雲陽間四十四年川湖兵夾勦中復降梟於市

保靖傳保靖兩江口土舍彭惠既以祖大蟲可宜與彭

藥哈俾世仇至是與宣慰彭九霄復構怨

臣嚴福

按九霄彭藥哈俾之孫也惠以祖大蟲可宜草職死

無所襲而九霄得襲祖職宣慰司忌之因為仇正德

中叅將清宣慰司地賦惠所據九江口實宣慰地遂

奪九江口七寨歸九霄於是仇益甚見蠻司合志謹

附考



明史卷三百十考證



總校官編修臣吳紹潔